



Sesida dals

18 d'avrigl 2016

Communitgà ils

20 d'avrigl 2016

Protocol nr.

373

Incumbensa Pfenninger

concernent l'adattaziun da la finanziaziun da la spitex

Resposta da la regenza

Ils 13 da zercladur 2007 ha il cussegl grond approvà ina revisiun parziala da la lescha per promover la tgira da persunas malsaunas e pia decidì d'extender la nova orientaziun strategica sin ils servetschs da la spitex e sin las chasas da tgira. Questa nova orientaziun strategica ha previs da pajar las contribuziuns en il sector da la sanadad dal Grischun tenor las prestaziuns. La contribuziun dal chantun als servetschs subvenziunabels da la tgira ed assistenza a chasa è vegnida fixada a 55 % dals custs betg cuvrìds per categoria da prestaziun, premess ch'ils servetschs vegnian furnìds en moda economica.

Cuntrari a las explicaziuns en l'incumbensa n'ha questa nova regulaziun da finanziaziun betg chaschunà ina spirala negativa ed è da princip sa cumprovada ord vista da la regenza. Ils custs renconuschìds dals servetschs cun ina incarica da prestaziun communal èn s'augmentads en cas da prestaziuns da tgira da 77.50 francs per ura l'onn 2008 a 96.40 francs l'onn 2016, en cas da prestaziuns da tegnairchasa da 65.20 francs a 74.80 francs per ura ed en cas dal servetsch da pasts da 18.30 francs a 21.90 francs per past. Correspundentamain è sa meglierà il grad mesaun da la cuvrìda dals custs da las organisaziuns da la spitex tenor la finanziaziun ordinaria da 93,9 % l'onn 2008 a 100,7 % l'onn 2014.

En il rapport davart la finanziaziun dals ospitals e da la tgira en il chantun Grischun dal 1. da mars 2016 ha la regenza explitgà tge mancanzas ch'existan – ord ses puntg da vista – en il sector da la finanziaziun da la tgira e tge mesiras ch'ella ha prendì en mira per eliminar questas mancanzas en cas ch'il cussegl grond vul cun-

tinuar cun la regulaziun vertenta da la finanziaziun dals ospitals e da la tgira. Las mancanzas e las mesiras sa refereschan bain al sector da la tgira, ellas valan dentant, sch'ellas vegnan adattadas, er per il sector da la spitex. Cun concepir las mesiras vegn ins ultra da quai a stuair examinar, sche e per quant ch'ils criteris menziunads (topografia, extensiun e vischinanza dal cunfin) ston vegnir integrads en l'adattaziun da la regulaziun da finanziaziun.

La regenza è pronta d'acceptar l'incumbensa en il senn da las explicaziuns menziunadas qua survart.



En num da la regenza

Il president:

Il chancelier:

Dr. Chr. Rathgeb

Dr. C. Riesen